



## 聽臺灣百姓个心聲

清朝个時，祖先過來臺灣「心肝結歸鬮」，這即係現時臺灣百姓个心情。成過臺灣創造出「臺灣經濟奇蹟」，感覺真驕傲，不過嘛付出真大个代價。現時个臺灣，食个物件摻塑化劑，毒(teu)臺灣百姓三十外年，得百姓心驚膽跳。舊年又有棉籽油个假油事件，現時更加有汁油事件，禍害歸臺灣百姓、歹名聲透國際。這到底愛臺灣百姓愛仰子食正好？

普通事講「食飯皇帝大」、「民以食為天」，成過个人見面相借問个第一句事係「食飽旨？」，現時食飽無問題，毋過嘅變做食了真毋會安心。逐日个新聞擱在報又有一兜物件有用汁油，經到百姓心肝底問，到底哪兜物件正會用安心來食？嘛想討問，這幾時正毋會擱發生。

另外高雄个氣爆，犧牲三十外个人个生命，三百外人著傷，百姓嘛真想討問，哪條路係會得人安心行个，哪個所在係得人蹓了會用安心个。到底泥下猶埋幾多毋知个管路。嘛莫講環保做幾好堵幾好，會用頭科學个方法處理豬屎尿、管理幾嚴擱幾嚴，若按仰子真多水溝會變做烏汁汁。

講到底這即係生意人个貪，公務人員个懶，法官个容，今日臺灣正會出恁多事。雖然講刷頭生理有人做，了錢生理無人做。毋過，法官若對這兜無天良个生理人重罰，得佢人無法度擱東山再起，拗佢人關到頭那毛和嘴鬚攏變白，無法度享受遐兜無良心錢。按佢人即較毋敢烏白來，做這兜無天良个事。對失職个公務人員嘛愛照考績法和法律得佢人得著該有个處罰，千萬毋會用重重擎起，輕輕放落來，做得人蹓，過後又像船過水無痕無事。其實百姓愛个真簡單，即係食會安心，蹓會起，行路會安全，社會有公平、正義，大家有機會出頭天。

作者：李秉璋

### ☆詞彙學習☆

【塑化劑】soo' fa' ze'：一種使材料柔軟化、液化的工業用原料。 【管路】guen' lu：管線，此處指的是石化管線。

【棉籽油事件】mien' zi' rhiu' su kien：2013 年臺灣食用油造假事件。以低價的棉籽油

添加銅葉綠素混充高級橄欖油販賣，嚴重影響食品安全，又稱黑心油事件。 【烏汁汁】bbu' zib' zib'：形容東西極度的髒，髒到很黑的樣子。

【容】rhung'：縱容。

【汁油】zhib' rhiu'：餿水油，利用廚餘、回鍋油及腐壞的動物皮、肉等加以提煉出的油。

【了錢】leeu' cien'：賠錢。

【蹓會起】dai' bbue ki'：住得起，買得起房子。

【高雄氣爆】goo' hiung' ki' bau'：2014 年 7 月 31 日發生在高雄市前鎮區與苓雅區，由丙烯所引起的石化氣爆炸事件，造成 32 人死亡，300 多人受傷，道路嚴重損毀。